



REPUBLIKA E SHQIPËRISË
KOMISIONERI PËR MBROJTJEN NGA DISKRIMINIMI

Nr. 475/1 Prot.

Tiranë, më 02 . 03 . 2026

V E N D I M

Nr. 49, Datë 02 . 03 . 2026

Bazuar në pikën 11¹, të nenit 33, të ligjit 10221/2010 “Për Mbrojtjen nga Diskriminimi”, të ndryshuar, Komisioneri për Mbrojtjen nga Diskriminimi²,

K O N S T A T O N :

Mbështetur në nenin 32, pika 1, shkronja “a”, dhe pika 3 e këtij neni, si dhe nenin 33, të ligjit 10221/2010 “Për Mbrojtjen nga Diskriminimi”, të ndryshuar, Komisioneri për Mbrojtjen nga Diskriminimi, ka ndjekur të gjithë hapat që parashikon procedura e hetimit administrativ, për të shqyrtuar ankesën nr. 127, datë 28.05.2025, të bërë nga Fondacioni “Së Bashku”, përfaqësuar nga znj. S.L, Drejtore Ekzekutive, kundër Bashkisë Vorë, në të cilën pretendohet për diskriminim për shkak të “aftësisë së kufizuar”.

Bazuar në Ligjin 10221/2010 “Për Mbrojtjen nga Diskriminimi”, të ndryshuar, në përfundim të procedurës së hetimit, Komisioneri ka dalë me Vendimin nr. 242, datë 30.10.2025, me anë të të cilit, ka vendosur:

¹ “Nëse Komisioneri urdhëron rregullime ose masa, personi kundër të cilit është paraqitur ankesa, raporton brenda 30 ditëve para Komisionerit në lidhje me veprimet e ndërmarra për zbatimin e vendimit. Në rast se personi, kundër të cilit është paraqitur ankesa nuk e informon Komisionerin ose nuk e zbaton vendimin, Komisioneri vendos masë për ndëshkimin me gjobë për personin kundër të cilit është paraqitur ankesa. Sanksioni me gjobë shfuqizohet nëse personi kundër të cilit është paraqitur ankesa, e zbaton vendimin brenda shtatë ditëve pasi është vendosur sanksioni”.

² Në vijim do t’i referohemi si Komisioneri ose me akronimin KMD.

1. *Konstatimin e diskriminimit në formën e rëndë të tij, të personave me aftësi të kufizuara, nga ana e Bashkisë Vorë, për shkak të mungesës së aksesit në stacionet e transportit publik/autobusëve në territorin e Bashkisë Vorë.*
2. *Në referim të pikës 1, Bashkia Vorë, të marrë masa të menjëhershme për:*
 - a. *Plotësimin e të gjitha standardeve të aksesueshmërisë në stacionet e transportit publik/autobusëve, sipas parashikimeve në vendimet e Këshillit të Ministrave nr. 1503, datë 19.11.2008, “Për miratimin e rregullores “Për shfrytëzimin e hapësirave nga ana e personave me aftësi të kufizuara” dhe nr. 1074, datë 23.12.2015 “Për përcaktimin e masave për mënjanimin e pengesave në komunikim dhe infrastrukturë në ofrimin e shërbimeve publike për personat me aftësi të kufizuara”.*
 - b. *Hartimin e një plani masash për evidentimin e të gjitha objekteve ekzistuese, për të cilat nevojitet përshtatshmëria, me qëllim parandalimin e situatave diskriminuese ndaj personave me aftësi të kufizuara. Pjesë e planit të masave duhet të jetë planifikimi progresiv i fondeve të nevojshme për përshtatjen dhe përcaktimi i afateve kohore për realizimin e përshtatshmërisë.*
3. *Bazuar në nenin 33 pika 11, të ligjit “Për Mbrojtjen nga Diskriminimi”, të ndryshuar, Bashkia Vorë, detyrohet që brenda 30 (tridhjetë) ditëve të njoftojë Komisionerin, lidhur me veprimet e ndërmarra për zbatimin e këtij vendimi.*

Rezulton e provuar nga Lajmërim marrja e shërbimit postar, nr. RR794891020AA, se Bashkia Vorë ka marrë dijëni për vendimin në datë 31.10.2025, dhe nuk ka njoftuar Komisionerin, lidhur me masat e marra për zbatimin e vendimit sipërcituar, konform afateve ligjore të përcaktuara.

Komisioneri për Mbrojtjen nga Diskriminimi me shkresën nr. 213, datë 26.01.2026, drejtuar Bashkisë Vorë, ka kërkuar informacion mbi zbatimin e Vendimit nr. 242, datë 30.10.2025 të Komisionerit.

Me shkresën nr. 570/1, datë 17.02.2026, Bashkia Vorë, informoi se: *“Në mungesë të hapësirave të mjaftueshme për vendosjen e stacioneve të ndalimit të autobusëve (strehë), problematikë e përmendur edhe në shkresat e mëparshme, Bashkia Vorë mund të ndërhyjë në 23 pika vendqëndrimi (strehë). Procedurë e cila do të tenderohet gjatë vitit 2026, sipas projektit teknik të stacionit të autobusëve. Bashkia Vorë do t’ju njoftoj për procedurat në vijim. Bashkëlidhur projekti teknik i stacionit të autobusëve dhe hartat e linjave të autobusëve”.*

Nga informacioni i sipërcituar, Komisioneri vlerëson se Bashkia Vorë, nuk ka zbatuar vendimin e Komisionerit, duke mos dërguar planin e masave për evidentimin e plotë të situatës së plotësisimit të të gjitha standardeve³ të aksesueshmërisë në stacionet e transportit publik/autobusëve, si dhe të planifikimit progresiv të fondeve dhe përcaktimit të afateve kohore të realizimit të tyre.

³ VKM nr. 1503, datë 19.11.2008, “Për miratimin e rregullores “Për shfrytëzimin e hapësirave nga ana e personave me aftësi të kufizuara” dhe nr. 1074, datë 23.12.2015 “Për përcaktimin e masave për mënjanimin e pengesave në komunikim dhe infrastrukturë në ofrimin e shërbimeve publike për personat me aftësi të kufizuara”

Sa më sipër, rezultoi e provuar se, Bashkia Vorë, në cilësinë e subjektit të gjetur përgjegjës për sjelljen diskriminuese, nuk ka marrë masa për zbatimin e Vendimit nr. 242, datë 30.10.2025, të Komisionerit. Në këtë mënyrë, Bashkia Vorë nuk ka përmbushur detyrimin ligjor të parashikuar nga neni 33, pika 11, të ligjit nr. 10221/2010 *“Për Mbrojtjen nga Diskriminimi”*, të ndryshuar. Ky mosveprim, kjo mospërmbushje e këtij detyrimi ligjor, në bazë të nenit 33, pika 13, të ligjit të sipërpërmendur, shoqërohet me marrjen e masave administrative, gjobë. Për personat juridik, siç është në rastin konkret Bashkia Vorë, ky nen përcakton shkrehimisht: *“Çdo person që shkel dispozitat e këtij ligji dënohet me gjobë si më poshtë”*:..... b) *personi juridik nga 60.000 deri në 600.000 lekë;.....”*

Për sa më sipër, Komisioneri për Mbrojtjen nga Diskriminimi arrin në konkluzionin se, Bashkia Vorë është në shkelje të detyrimit ligjor të përcaktuar në nenin 33, pika 11, të Ligjit nr. 10221/2010 *“Për Mbrojtjen nga Diskriminimi”*, të ndryshuar, shkelje e cila sipas nenit 33, pika 13, të po këtij ligji, është e dënueshme me gjobë.

Në lidhje me masën e gjobës, Komisioneri mban në konsideratë parashikimet dhe kriteret e vendosura në nenin 33, pika 12, të Ligjit nr.10221/2010 *“Për Mbrojtjen nga Diskriminimi”*, të ndryshuar, ku sanksionohet se: *“12. Kur vendos masën, komisioneri siguron që ajo të jetë: a) e efektshme dhe parandaluese; dhe b) në përpjesëtim me gjendjen që e shkaktoi vendosjen e masës. Nëse vendoset gjobë, komisioneri përcakton shumën e gjobës duke marrë parasysh: i) natyrën dhe fushën e veprimit të shkeljes dhe ndikimin mbi viktimën; dhe ii) rrethanat personale e financiare të shkelësit, veçanërisht duke marrë në konsideratë të gjitha burimet e të ardhurave dhe nëse shkelja kryhet nga një person juridik privat, merren parasysh aktivet e bilancit dhe fitimi, si dhe pagat totale të paguara punonjësve; c) nëse e njëjta shkelje diskriminon disa persona, vendoset vetëm një gjobë, por duke marrë parasysh kërkesat e shkronjës “b” të këtij neni.”*

Duke mbajtur në konsideratë kriteret e mësipërme për përcaktimin e masës së gjobës dhe bazuar në: faktin që, shkelja e konstatuar prek një komunitet personash; faktin që, personat me aftësi të kufizuara të cilët diskriminohen nga shkelja e konstatuar, janë një komunitet vulnerabël; faktin që, Bashkia Vorë është përsëritëse⁴ në konsumimin e shkeljeve të së njëjtës natyre: Komisioneri, arrin në përfundimin se, Bashkia Vorë duhet të gjobitet me 300.000 (treqind mijë) lekë, për moszbatimin e Vendimit nr. 242, datë 30.10.2025, të Komisionerit.

PËR KËTO ARSYE:

Mbështetur në nenin 32/1, shkronja “ç”, neni 33, pikat 11, 12, 13/b dhe 14, si dhe nenin 33/1, të ligjit nr. 10221, datë 04.02.2010 *“Për Mbrojtjen nga Diskriminimi”*, të ndryshuar,

Komisioneri për Mbrojtjen nga Diskriminimi,

⁴ Referuar Vendimit me gjobë nr. 182, datë 12.09.2023, të Komisionerit.

V E N D O S I:

1. Bashkia Vorë, të gjobitet në vlerën 300.000 (treqind mijë) lekë, për moszbatimin e Vendimit nr. 242, datë 30.10.2025, të Komisionerit për Mbrojtjen nga Diskriminimi.
2. Gjoba të derdhet në Buxhetin e Shtetit, brenda 45 ditëve nga marrja dijani.
3. Pagesa e kësaj vlere të bëhet pranë çdo banke në llogarinë e thesarit Tiranë, për llogari të: Komisioneri për Mbrojtjen nga Diskriminimi, NIPT: L02027451K, Kodi i institucionit përfitues: 1091001, Kodi i Degës së Thesarit: 3535, Kodi i llogarisë ekonomike: 7115499.
4. Zbatimi i Vendimit nr. 242, datë 30.10.2025, të Komisionerit për Mbrojtjen nga Diskriminimi, brenda shtatë ditëve nga marrja dijani për sanksionet, sjell shfuqizimin e tij.
5. Kundër këtij vendimi lejohet ankim në gjykatë, brenda 45 ditëve nga marrja dijani, sipas parashikimeve ligjore të Kodit të Procedurave Administrative, të ndryshuar.

KOMISIONERI

Robert GAJDA